

Visoki predstavnik Schmidt posjetio Travnik: Vlasti i privrednici trebaju raditi zajedno na unapređenju ambijenta za investiranje



Visoki predstavnik Christian Schmidt prisustvovao je danas manifestaciji „Dani dijaspore 2023“ u Travniku, te je iskoristio priliku da se obrati Poslovnom forumu dijaspore. Zajedno sa načelnikom Kenanom Dautovićem, visoki predstavnik je posjetio i uspješna lokalna preduzeća te razgovarao sa poduzetnicima iz dijaspore i iz Travnika o potencijalima za ulaganje u BiH. Naglasio je da je održavanje veza između BiH i dijaspore korisno za širenje poslovnih mogućnosti i promoviranje investicija kako u Travniku tako i širom Bosne i Hercegovine.

„BiH i organi vlasti na svim nivoima trebaju raditi više na stvaranju boljeg ambijenta za investiranje, u saradnji sa poslovnom zajednicom i bh. dijasporom. BiH ima veliku i uspješnu dijasporu, što stvara prostor za brojne prekogranične poslovne prilike i investicije. Ipak, jednako je važno raditi više na stvaranju boljih mogućnosti kod kuće kako bi mladi ljudi bili motivirani da ostanu živjeti ovdje“, dodao je visoki predstavnik.

Visoki predstavnik Schmidt posjetio je Katolički školski

centar „Petar Barbarić“ u Travniku i sastao se sa direktorom Željkom Marićem kako bi se informirao o planovima Centra i ukupnim mogućnostima i izazovima u sektoru obrazovanja u Travniku i Srednjobosanskom kantonu.

Tokom boravka u Travniku, visoki predstavnik je također posjetio džamiju Sulejmaniju i muzej i rodnu kuću nobelovca Ive Andrića zajedno sa načelnikom Dautovićem i poduzetnicima Snježanom Köpruner i Sanjinom Kotlicom. Na kraju posjete, visoki predstavnik je obišao i kapelu svetog Ivana Pavla II u Margetićima.